


docriver 文川网  
入驻商家 古籍书城  
在文川网搜索古籍书城 获取更多电子书

〔清〕查慎行著  
周 劭 標點

# 敬業堂詩集

王遂常

〔中〕



上海古籍出版社

首都师范大学图书馆



21101027

1101027

# 敬業堂詩集卷十九

## 敝裘集

起甲戌十一月，終十二月。

入都凡三度，多在春夏之交。未嘗從風雪中跨驢也。甲戌重陽後，自金華歸里，兩接愷功札，促余北行，遂於長至前五日束裝。一羊裘已十五年，裘則敝矣，而行役尙不知止，可嘆也。

## 敝裘二一首

中道誰能便棄捐，蒙茸雖敝省裝綿。曾隨南北東西路，獨結冰霜雨雪緣。布褐不妨爲替代，綈袍何取受哀憐。敢援齊相狐裘例，尙可隨身十五年。

冷暖相關老倍知，黑貂何必勝羊皮。留同敝袴非無用，好比緇衣或改爲。取醉難償村

店值，有人還當釣簑披。家貧舊物無多在，不忍吹毛更索疵。

### 山塘與德尹別

歸何草草出匆匆，聚散全非意料中。長路一痕添日綫，是日冬至。征衣幾縫裂霜風。未  
論去國經年別，且喜停舟五夜同。記取欲眠頻坐起，半塘橋北虎丘東。

### 家二瞻兄八十壽

我觀造化初無權，仁者自壽其天全。老翁小兒兩遊戲，直以渾沌還吾天。不爲物用而  
用物，噴洩元氣成雲烟。古來絕藝兼者罕，鍾王顧陸名各專。輞川摩詰書未稱，三絕獨數  
滎陽虔。眉山海嶽不復作，松雪兩派猶相沿。先朝倪沈及文董，筆力亦足追前賢。吾兄妙  
手靡不備，書法入聖詩能仙。偶然點染作圖畫，別有天授非人傳。興來百紙一掃盡，散去  
半落雞林船。貴游踏破鐵門限，欲乞尺幅終無緣。有時自銘退筆冢，經歲或乏看囊錢。乃  
知此事因品重，兄豈自負人云然。維揚地薄耆舊少，流寓欲占文星躔。今年九月屆大耋，

docsriver 文川网  
入驻商家 古籍书城

在文川网搜索古籍书城 获取更多电子书

初度恰在重陽前。一門諸弟頭盡白，謂楷五、秋山兩兄。茱萸醉插隨兄肩。羨兄晚節比彭澤，祝兄添丁如玉川。兒年二十翁百歲，及看舞袖黃花邊。

題從孫汝誠倚劍圖小影二首

櫛具橫腰首抹巾，天然秀骨出風塵。乃翁已被從軍誤，傷尊公荆侯。勸爾休爲佩犢人。

舞來。  
義獻門風世共推，汝誠爲二瞻兄嫡姪孫。階庭蘭玉總多才。自言劍術通書法，曾看公孫妙

發揚州留別汪庾齊

旅況殘年最不堪，何期解后作深談。向風嘶馬程程北，背雪飛鴻片片南。殘燭乍移寒減半，征帆欲挂酒行三。隋堤柳態禁搖落，也傍汪倫百尺潭。

### 夜宿邵埭

水柵千家市，烟村十里橋。蘆灘聲響響，燈舫影搖搖。風止鷗機息，寒深酒力消。獨眠無好夢，愁度最長宵。

### 淮浦冬漁行

長淮冬涸成溝渠，風雪夜折荒洲蘆。小船沖沖鑿冰去，冰面躍出黃河魚。衝寒捕魚作漁戶，手足皸瘃無完膚。三時轉徙一冬復，淵藪偶寄蝸牛廬。無田不得事農業，有水尙欲輸官租。自從十年淮泗滿，平地下受滔天湖。誰驅鱗介食人肉，漏網幸脫鸞刀誅。得時鼃鼃聚窟宅，失勢魴鯉充庖廚。眼前竭澤有餘憾，取快報復聊須臾。但看明年春水上，魚鱉又占居民居。

### 輓喬石林侍讀

本朝治水關全局，東下狂瀾勢難復。先生獨以手障之，言卒施行身早逐。徵車北去全家懼，昇櫬南歸萬人哭。百年陰德被淮揚，公在九原應瞑目。

從孫恒侯自淮安送我渡河口占志別

吹斷西風雁一繩，離情鄉思兩瞢騰。醉衝白日孤城霧，曉渡黃河十里冰。去意隨蛇遮不住，識途如馬老偏能。未應輕別淮南路，隻影從挑夜夜燈。

逆旅行

用王半山轉韻體

行人爲客居人主，聊以稱呼代爾汝。入門不揖出不辭，主今知客却爲誰。等閒無事休爲客，幾個相逢尙相識。相逢相識非不多，賢於逆旅能幾何。

宿遷遇巡河使者

使者冬行水，居人歲避河。暫時停畚鍤，何計脫風波。賦歛殘年急，隄防下策多。皇

華期盡職，報稱意如何？

### 邳州道中雪

野闊黃河岸，天低下相城。幾家沙際沒，單騎雪中行。漸壓輕裝重，俄添老眼明。路難兼歲晚，那免嘆孤征。

### 雪後風日晴暖

陰霾一夕解重圍，頓覺朝來朔氣微。得暖渾如杜康力，殺霜終是趙衰威。細流飲馬知冰釋，殘雪隨風作絮飛。至竟村翁勝行客，茅檐晴曬木棉衣。

### 夜至馬陵

苦霧噴沙氣若蒸，荒程月黑夜無燈。前岡十里黃茅路，野火光中見馬陵。



### 滕縣

客從宿遷來，日日灌莽裏。今晨到滕縣，孔道平始砥。民居稍稠密，田野亦耨理。疎樹排棗梨，短樊插棘枳。雞豚飯商賈，葱薤飽婦子。居然似樂國，以彼乃形此。滕當戰國時，褊小五十里。自從置郡邑，其大實倍徙。縣令視諸侯，提封非昔比。西南際蕭沛，豁達開顧指。回頭淮泗郊，窪若陷井底。可憐百萬戶，頻爲蛟鱷徙。山東地勢高，厥患不在水。所期一尺雪，二麥青可起。山左自四月至今苦旱。

### 嶧山二首

泰岱分餘脈，差堪比附庸。祇因生下邑，讓爾作奇峯。

作俑何人始，吾將罪李斯。如今山上石，多刻去思碑。鄒、滕之間，丞尉以下俱勒石頌德政。

### 過兗州城外有感

泗水橋西路，垂鞭去意遲。老爲東郡客，才減少陵詩。白日黃塵暗，孤城萬木悲。遺民應已盡，莫問亂離時。

### 冒風過東平州暮投張秋鎮

沙旋頭疑眩，聲喧耳欲聾。不愁衝凍雨，直怕遇狂風。土鏗煤烟黑，爐灰豆火紅。老妻加被絮，今夜奏奇功。

### 館陶早飯題壁

楊椿迷野岸，棗刺拒城壕。小縣門常閉，紆途僕告勞。半窗東日暖，一飯北風饒。聊記吾曾到，留詩過館陶。

### 大風至鄭家口

黑雲奔騰西北來，平地忽陷山疑頽。簸揚砂礫作糠粃，雜以萬斛葭蘆灰。陽鳥退飛翅

摧折，天狗下墮聲喧。千年樹拔虎豹窟，四海水立蛟螭堆。我行到此迷失道，馬立歧路鳴徘徊。意中了了識村落，目所未見終疑猜。夕陽乍吐鄭家口，豁若明鏡函初開。半年遊跡入醉夢，下馬更盡當風杯。四月十五夜，奉陪徐座師於此地看月，故結處及之。

### 戲題旅壁畫龍

誰言尤物性難馴，長養方成爪角鱗。畫手不然爭貌得，可憐曾傍象龍人。

### 野氣詩

朝陽射北陸，野氣何迷濛。忽生無根雲，幻作有影風。沄沄水波去，冪冪村烟封。千林皆動搖，四顧爲虛空。我聞氣升降，閉塞方成冬。而此從何來，吹萬將毋同。大哉古今宙，都攝一氣中。鉅者運鯤鵬，細或吹蟻蠓。試從一身論，可以究始終。恢恢賢聖途，剛大秉降衷。養之塞兩間，浩然靡不充。若者爲正氣，仁義澤厥躬。反是則爲邪，百感交外攻。五事協五行，輕清秀所鍾。不鑿渾沌竅，自然得玲瓏。若者爲清氣，視明旺亦聰。反

是則爲濁，人心有盲聾。生氣既初發，萌芽葆芘蒙。不敢輕散抒，所以厚蘊崇。若乃礪笑刃，旁開騁談鋒。是名曰殺氣，取快誰見容。朝氣爽且朗，古鑑磨青銅。不事察察明，謙謙與人恭。其或長傲慢，鷓張徒予雄。是名曰暮氣，衰至驕必叢。凡此機相關，動與呼吸通。不知野氣者，其類當奚從。或如葭蘆灰，候至應管筒。或如古井水，冬暖冰常融。然而無附著，所向皆游蹤。於人似客氣，往來日憧憧。熏面使黧黑，醉顏發狂紅。移之入釜鬻，饋餽侈然豐。移之襲官骸，咳嚏噴霾霧。又疑天壤內，物理難終窮。蒸沙詎成搏，煮石豈得鎔。受性不受氣，造化誰尸功。不如且坐睡，萬象歸朦朧。

### 趙北口坐冰牀

古堤老柳一時僵，水腹初堅黑白洋。稍與長途休馬力，冒寒半日坐冰牀。

### 白溝旅宿感舊

南北勞勞已十霜，瓦橋關外又嚴裝。今宵新月入窗早，去日小鬟如我長。斑鬢重來無

伴侶，甲子入都，同錢玉友、翁樹服，己巳則家次谷、陳元之。庚午春同姜西溟南歸，甲戌復偕翁康、鮎輩北上，皆宿此店。舊題幾字失偏旁。燕南酒美魚羹賤，不解愁人獨憶鄉。

立春日同愷功侍講作即用敝裘二一首韻

土牛寒氣漸應捐，猶戀征袍未拆綿。東閣探梅還有信，西堂夢草獨無緣。憶德尹。春生帝里如相就，老傍侯門越可憐。南去北來成底事，暗消髀肉是今年。

逝水流光黯自知，依然一室對烏皮。冰將釋硯眞吾幸，雪可搏獅任客爲。老柳受風終綽約，孤松經凍太離披。詩從鍊後鋒芒出，正要旁人摘小疵。

再疊前韻示愷功

半生習氣老來捐，熨貼終輪裏鐵綿。待兔祇疑株可守，求魚方悔木難緣。偶然鴻爪留還去，果否蛾眉妬是憐。一種東風消不得，鬢邊霜雪又增年。

海內人才略可知，也曾高會與南皮。三年刻楮將安用，一技雕蟲壯不爲。酒市天寒愁客散，書帷晝靜喜人披。與君相對春風裏，只有冰壺不掩疵。

### 讀白奪山人詩和愷功三首

亭長臺邊一酒徒，仰天故作大聲呼。氣驕星宿生芒角，手擘山川入陣圖。急縛何人攫怒虎，叢祠有鬼託妖狐。眼空江表衣冠族，搖筆猶堪殺腐儒。

人謂狂生本不狂，漆身吞炭事何常。亂餘賓客搜亡命，赦後英雄恥故鄉。寶劍塵封三尺水，麻鞋寒踏九州霜。隨身一掬瀾翻淚，不哭窮途哭戰場。

一卷頻浮大白開，卽論詩句亦雄才。到天峭壁千尋立，破浪長風萬里來。石火光中亡國恨，鐵函井底後人猜。可憐芒碭無雲氣，山色於今死若灰。

## 酒人集

起乙亥正月，盡六月。

甲戌偪臘抵都，偕家聲山僦居宣武門外，與姜西溟、惠研谿寓舍相望。自新年始，約爲詩酒之會。吳中則唐實君、趙蒙泉，海陵則宮友鹿七人而已。湯西厓、錢木菴、亮功兄弟時或一至，後益以翁康飴、陳六謙、狄向濤、楊崑木，稍爲好事所傳。他有宴會，牽率入座，大約月必有集，集必有詩。聲非擊筑，名託酒人，各有取爾也。

### 西厓四十初度援筆爲壽兩人交誼略見於此非祝嘏之詞也

甲子夏五月，我初客燕山。逢君槐樹街，披豁示肺肝。君時二十九，譽滿公卿間。我長慚七年，姓名尙泥蟠。居然荷兄事，齒序非所安。因緣求友生，稍使徑路寬。寧知遇秋賦，別足同蹒跚。古寺郭西門，頽虬柿垂丹。霜天夜蕭槭，落葉堆空欄。男兒屬有才，九萬終鵬搏。向來輕薄子，洗眼爭相看。我時仍失意，寸進弓難彎。不敢怨窮途，借君激頽頑。長恐命運薄，終身比劉瓛。音桓。皇天困斯人，日月雙跳丸。丘壑閉冪霧，江湖駭驚湍。側聞夙昔遊，一一趨金鑾。如君尤聳拔，刷羽超鸞鸞。落筆中書堂，集賢羣聚觀。大官饌常賜，內府金頻頒。至尊賞文辭，步接螭坳班。猶能念微賤，枉札來榛菅。感君期我深，暴棄難自拚。勸我舉京兆，送我赴春官。憐我下第歸，臨歧話悲酸。誰當旣得路，枯苑

仍相關。長途冰雪交，鶴語今年寒。還家席不暖，又鞞衝風鞍。人皆嗤此來，此來豈無端。君年適四十，正及叨杯杓。君壯騰青雲，我衰改朱顏。詩成非善頌，聊記平生驩。

### 元夕前三日飲惠研谿寓齋與錢玉友亮功分韻

春寒半月透重繭，曲巷層冰凍尙堅。策蹇人尋行樂地，快晴天趁挂燈前。侵陵白髮違歌酒，惱亂朱門沸管絃。誰似閒官能愛客，朝衣典去作新年。

### 與陳六謙戶部話舊

二十年前兩酒人，京華相見意尤親。田園暫返如孤客，邸舍翻來作近隣。難就微名成我懶，未除宿習取君真。狂言自駭家僮聽，誰識忘形舊主賓。

### 上元夜同唐實君趙蒙泉宮友鹿家聲山飲姜西溟同年寓分韻

#### 得雨字



北風未解嚴，刮面射強弩。富兒馬足塵，游子衣上土。我有同年生，一椽望衡宇。每因赴讌會，暫得命儔侶。時節近上元，滿城競簫鼓。公卿例召客，僕指略可數。燭幌白生虹，燈屏紅窄堵。空明大圓鏡，爛熳散歌舞。可憐玉川居，破屋用茅補。荒庭一堆雪，月色帶清苦。也復呼其羣，經營同地主。不辭口腹累，爲愛風義古。酒行爵踰三，殺列簋倍五。先生鄙肉食，下箸輒欲吐。如何點食單，亦溷烹魚釜。西溟性不嗜肉，或誤食必以清水灌盥，而盤餐乃具此味。卽此毋已奢，誰能諒貧窶。我窮興蕭索，藉爾作豪舉。雅令旣匝巡，拇陣捲風雨。主人但旁觀，堅坐恣狎侮。肯爲瓶告罄，相勸力須努。新詩信手成，險韻鬪虓虎。費君三月俸，醉我一夕許。忽聞耳熱歌，寒律變溫煦。

王赤抒新葺一齋名曰野航邀余對酌出詩索和卽次原韻

忘機到處總虛舟，別起齋名借楫頭。已是除塵得瀟灑，若教臨水更清幽。兩三人可同君坐，五六年應爲此留。閒殺鷗邊好風景，荷塘宜夏蓼宜秋。

白田喬侍讀有家伶六郎以姿技稱己巳春車駕南巡召至行在

docsriver 文川网  
入驻商家 古籍书城

在文川网搜索古籍书城 获取更多电子书

曾蒙天賜自此益矜寵庚午四月余從京師南還訪侍讀於縱  
棹園酒間識之有青衫憔悴無如我酒綠燈紅奈爾何之句時  
東海徐尙書射陵宋舍人慈谿姜西溟俱在座相與流連彌夕  
而散去冬北上重經寶應則侍讀下世旅櫬甫歸余入而哭之  
盡哀何暇問六郎蹤跡矣及至都下聞有管郎者名擅梨園一  
時貴公子爭求識面花朝前八日翁康飴戶部相招爲歌酒之  
會忽於諸伶中見之私語西厓曰此子何其酷似白田家伶蓋  
余向未知六郎之姓也西厓旣爲余道其詳竟酒爲之不樂口  
占四絕句以示同席諸君

鬢影衣香四座傾，風流爭賞米嘉榮。  
就中獨有劉賓客，曾聽涼州意外聲。

鴨桃花外小池臺，湫澹舳舻一棹開。  
春色滿園人盡妬，君王前歲賜金來。

一羣穠豔領花曹，頭白尙書興最豪。記得送春筵畔立，酒痕紅到鄭櫻桃。

茶烟禪榻隔前塵，存歿相關一愴神。自琢新詞自裁扇，教成歌舞爲何人？

### 題楊次也所藏朱北山墨繡毬花

春風壓簾吹不動，簇蒂攢莖密無縫。美人纖手搓欲圓，嬌鳥一梢低更重。駢枝倒挂玉蕊仙，暖氣散作藍田烟。粉痕洗盡墨光出，自有此花無此妍。

花朝實君招同西溟蒙泉研谿西厓友鹿聲山寓齋雅集分韻得

### 過字青字

二月無花看，今年雨雪多。不辭官獨冷，翻喜客頻過。灑掃門庭潔，芟除禮法苛。愛君新句好，諷諭擬元和。

客久頭垂白，交深眼倍青。坐銷愁裏日，來聚酒邊星。假借通隣曲，盤餐及使令。春郊花事近，後約更旗亭。

### 題項霜田讀書秋樹根圖

讀書未必皆識字，涉獵耳目爲窮探。此生枉伴蠹魚老，飽蝕卷帙寧非貪。文成有韻或吞剝，事出無據徒撻撻。熟從牙後拾王李，纖入毛孔求鍾譚。橐駝馬背所見少，自享敝帚矜著簪。雷同不滿識者笑，人盡能此燕無函。蘭苕翡翠稍秀異，什伯略可數二三。時情祇取供近玩，崇雅刪鄭誰能諳。我持此論衆大怪，相戒勿聽無稽談。廿年硯田困衣食，撥置夙好隨嬰媮。排辭偶句受人役，渴飲墨汁同潘泔。有時間作崛強語，蓼辛荼苦終非甘。項生乃有嗜痂癖，謬辱推許張頤頤。謂余頗可附同調，與別白黑分青藍。君才於世故無匹，氣象外拓神中含。屢遊京洛結文社，獨向魯國稱奇男。空拳亦足搏犀兕，大鼎詎止容罍觥。一鞭入海走巨石，千丈倒壑回枯枿。逍遙鸞鶴控紫極，活潑魴鯉游澄潭。才高氣盛心轉細，獨繭一一絲抽蠶。問君此境豈易到，確有階級難旁參。向來正得讀書力，閉戶萬卷曾沈酣。源流正變瞭指掌，北斗在北南箕南。光開飛電十行下，機發伏弩千鈞擔。搜奇抉

險富詩料，然後所向無矛鏃。庭空樹老得秋早，霜色染葉黃於柑。一編信手愛露坐，何用白石藏書菴。命工作圖索題句，劇壘相對吾奚堪。遇君尙應三舍避，君愈降氣余彌慚。詩成乞與摘紕繆，蹇鈍猶冀隨驂驪。此間風景有何樂，曷不歸去同書龕。

料絲燈史耕巖學士屬和即次原韻四首

勿論萬縷與千絲，似密還疎製絕奇。玳瑁筵前凝作片，珊瑚網底爛生枝。華堂金屋年年換，錯綵粧花種種宜。表裏孤光原洞達，曹騰醉眼任斜窺。

宛宛長廊小院東，藕絲不斷望疑空。巧穿針孔玲瓏影，吹透冰肌綽約風。簾幕花深長帶霧，畫圖山淺忽生虹。琉璃太脆紗紋薄，獨愛韜光黯淡中。

更從何處着纖塵，亞字文迴古錦茵。斜拂楊條藏語鳥，密牽苔綫過游鱗。顏筋柳骨書家格，吳帶曹衣鏡裏身。併作清輝開四照，不勞明月吐芳津。

駢枝儷葉技同稱，點墨何愁誤不興。射角星芒殊耿耿，照人風骨自稜稜。金波蕩月成

方折，玉氣生烟隔幾層。還與石湖添紀事，詩家新賦料絲燈。范致能有上元吳中紀事長律，所載燈名甚多，獨不及此品。

友鹿寓居孫公園與實君蒙泉崑木同巷僕及西溟聲山相距稍

遠友鹿作比隣詩二章亦來索和因次實君韻奉答

馬蹄纔過又車輪，廣術相逢亦太頻。不惜往來隨步履，預防倡和損精神。過牆濁酒能供客，鑿壁餘光倘借人。便與中央成鼎足，姜居西舍我東隣。時余移寓琉璃廠東。

造門不見等離居，俗例持牢急破除。余兩詣友鹿俱阻于關。僮約一條申典謁，客談幾處省傳書。巷連畢曜宜相就，雨過蘇端肯見疎。添取新篇爲日課，與君直似共鄉閭。

友鹿復次韻見寄恐其有過督司閤之意再疊韻解之二首

過門何止十朱輪，只有窮交不厭頻。語帶滑稽吾是戲，弊清摘發爾如神。犬應勿拒重

來客，花亦爭窺舊識人。從此得閒須徑造，巷南巷北總芳隣。

老屋西頭勝傲居，門前無草不須除。未妨排闥來驚臥，且喜還瓶肯借書。踪跡漸同詩境熟，形骸終要禮文疎。他時野老曾爭席，記得漁樵狎里閭。

### 盧樛菴七十壽詩

我愛盧仝居，翛然數間屋。先朝孝廉宅，過者猶屬目。再傳世其家，門徑不改築。一經稟庭誥，自教兒郎讀。早年赴舉場，高步笑馳逐。同儕重先輩，子弟尊者宿。正坐業太精，翻令身久伏。科名人拾芥，官爵鶯遷谷。白髮迫衰年，青衫自初服。神恬遜無悶，學殖富有蓄。紅扶壓架花，翠擁遮隣竹。刻鳩拄杖頂，放鶴前山足。世自鬧如蛙，吾方靜如鵠。回看軒冕客，萬事徒碌碌。分定兩不爭，生涯籌已熟。

### 送勞書升通政養親歸里



吾鄉前輩楊司馬，曾脫朝衫換彩衣。祖道回思十年事，都亭又見一人歸。白雲去國情相似，黃髮娛親古亦稀。不是明時輕解組，五湖烟水屬春暉。

### 豆腐詩和楊芝田宮坊四首

服食神仙事不難，磴牀幾轉便還丹。世傳淮南以丹藥點成。凝來石髓風猶嫩，點出春酥露未乾。倒篋易償隣叟值，顧名原合腐儒餐。人間賣菜多求益，休與先生溷一椽。

蛙瘦熊肥兩不知，太常終歲是齋期。半炊土竈然萁火，一頃山田種豆詩。饗子貧家先染指，廚娘纖手並凝脂。來其鄉味君休笑，三德虞家有贊辭。事見虞伯生集。

滑可流匙勝冷淘，不爭舌在齒牙牢。渾忘肉食聊名儉，偶佐村沽亦足豪。烹雪也宜施翠釜，割雲初不費銀刀。胡麻別試山僧法，口腹窮奢笑老饕。

茅店門前映綠楊，一標多插酒旗旁。行廚亦可咄嗟辦，下箸唯聞鹽豉香。華屋金盤眞

俗物，臘糟紅麴有新方。須知澹泊生涯在，水乳交融味最長。

### 問西厓病

小閣藤牀倦獨憑，門前仍遣小僮膺。一家多累愁何益，四海無醫感又增。春酒呼兒看滌器，夜棋留客對挑燈。可知七發真良藥，莫謂先生病未能。

### 戲題曹希文寫生蒲萄冊

東郭鹽，咸陽冶。朝入羊，暮騎馬。生不願封萬戶侯，亦不願領西涼州。但願蒲萄垂乳比桑葚，日日飽噉只學林間鳩。若使一官值五斗，家家爭釀蒲萄酒。枝頭無，紙上有，誰能截取老僧手？圖爲鑿上所畫。

### 再題朱北山所畫松鼠蒲萄

兒童把竹竿，飛鼠未可逐。暮四復朝三，蒲萄秋正熟。縱使身輕化蝙蝠，可憐兩翅仍兼肉。枝頭漸空莫緣木，明朝去竊官倉粟。

### 爲次也題秋花小鳥畫卷

一株鴨脚葵，色映紅黃紫。雞冠似經鬪，碎葉垂披靡。無端青螳螂，失勢忽落此。當其奮臂時，寧料草間委。飢禽不汝貫，集啄紛爪觜。似爲蟬復仇，反覆乃物理。二蟲何厚薄，是亦可以已。我欲解其圍，毫端呼不起。

### 研谿傳札訂望後出郊看杏花夜來微雨恐阻茲遊晨起風日晴

#### 明喜而有作

臥聞檐雨滴階鳴，意外東風曉放晴。爲作報書貪早起，門前吹過賣花聲。

### 送畢雨稼

古藤花底逢朱十，爲我長吟畢四詩。滿眼酒徒星散盡，送君還憶識君時。余初識雨稼於竹垞先生寓。

三月十六日同西溟實君蒙泉研谿六謙崑木石城友鹿永年向

濤霜田亮功次也南陔至興勝寺看杏花三首

弄袖風微不起沙，野田分路走三鴉。十年失計仍爲客，一醉無名特借花。白塔似招遊子騎，青旗錯認美人家。金丸落處休輕逐，小立逡巡避鈿車。先經摩訶菴，不得入。

幸是韶光處處同，勝遊隨意轉芳叢。別開香界松林外，遙指烟村杏社東。黛色濃添三面綠，日痕微減一分紅。只須十步凌丹閣，多少花頭在下風。

及記當時載酒遊，舊題幾壁拂塵留。重隨客到僧猶識，不待人言我欲愁。牧笛聲中芳草路，鞭絲影裏夕陽樓。花開花謝年年事，豈料傷春易白頭。

看花之會已成七律三章朝來耑木分牋屬賦七言歌行再作一

首

朝陽簷前報乾鵲，起赴城西看花約。東家借得蹇驢騎，快比揚州身跨鶴。豁然雙眼對明鏡，草樹無塵光躍躍。倚牆初見一梢紅，掩映垂楊作村落。漸行漸遠入佳境，花海茫茫浸樓閣。雲晴霧散天微霞，日色烟光互迴礴。自然得氣少人妬，縱使餘寒何處着。卯酒消來玉頰鮮，牙香熏透春衣薄。蝶沾蕊粉或雙去，燕拂花鬢時一掠。乍看半吐或全開，百面疑聞腰鼓作。因思前夜沾沙雨，特爲催花龍起壑。不然萬本及千株，那得同時齊破萼。此花舊是仙家種，肯向人間傍簾箔。自從禁苑植樊籬，已勅居僧司鎖鑰。寺後爲進御菓園。兒郎避路欵巾帽，嬌女窺隣少媒妁。可憐寂寂寄空園，也似飄飄客京洛。憶昨初來年尙壯，歡場往往貪酬酢。松林古寺摩訶菴，幾度陪遊履相錯。乙丑丙寅間，屢隨大司空朱公、少司馬楊公遊此。侍郎歸老尙書歿，前輩風流久寥廓。我留紫陌十經春，白髮隨梳旋隕籜。去年三月曲江宴，橫路紛紛爭出郭。此時羶穠更思鄉，未免當春懷抱惡。豈如今年風日佳，得喪心空別開鑿。青袍莫漫感憔悴，紅袖羞堪慰淪泊。楊家公子好心事，兩世交情宛如昨。已逢勝侶盡名流，況是閒官能脫略。雖云雅集忘賓主，治具終煩佐脾臟。是日備木治具。花前醉倒十五

人，坐有車公寧不樂？歸來忽忽記前夢，後會悠悠付成諾。禪房借榻眠海棠，野圃穿畦行芍藥。勿嫌生活太冷澹，竿木逢場聊戲劇。只愁火急促新詩，顏謝方將被陵轢。尋花本意取陶寫，覓句翻教困悉索。直須境過兩相忘，滿紙陳言總糟粕。

狄向濤庶常訂同人會飲海棠院是日僕適有他招別請下期研

谿以詩相惱戲答之

一春命侶原多暇，半日看花奈少緣。我爲頽唐姑避席，讓君獨作海棠顛。出劍南集。

三月晦日向濤治具招同西溟實君文饒研谿六謙崑木霜田亮  
功次也南陔岱瞻宗岱社飲寄園向未與會而今至者則胡芝

山周漁璜張天門陳堯愷姚君山玉階兄弟

客居感節物，鄉味想櫻筍。及此問名園，忽驚春向盡。歇鞍垂柳外，曲徑紆徐引。側帽入豐茸，迴身轉欄楯。羣賢次第到，虛坐前後盡。出曲禮，讀上聲，俗作儘。衆芳如媚客，四顧少

docsriver 文川网  
入驻商家 古籍书城

在文川网搜索古籍书城 获取更多电子书

蛙眴。丁香垂紛披，藤蔓縮菌蠢。海棠不少待，吹作胭脂粉。那無水一池，鼓吹出蛙眴。似嫌太寂寂，作意破寒窘。鯨波捲百川，目眩空花隕。亭臺亂金碧，有若浮海蜃。日飲正無何，老狂良足憫。唐侯但坐視，出語顧見哂。余與天門、亮功鬪酒盡酣，實君有「老馬入駒羣」之戲。幸無性命憂，何用須臾忍。春衣行且換，紅藥期將近。三百青銅錢，敝裘尙可準。

### 陸澹成侍讀招飲丁香花下同西溟崑繩寄亭作

花繁葉密暗迴廊，爲放庭空特撤牆。翠幕雲遮天四角，紅燈人醉樹中央。春辭小院離離影，夜受輕衫漠漠香。曾是往年連楊地，重來容易感流光。丁卯己巳間，與家荆州兄盤桓此地最久，故及之。

### 何倬雲戶部招諸同人飲藤花下

前日飲寄園，自辰徑終酉。連朝發酒病，解醉仍思酒。一笑赴佳招，相逢復開口。入門庭宇曠，槐蔭寬半畝。高格架藤花，有若魚貫柳。其梢多倒垂，其蔓必上走。蛟螭起擎



攪，纓絡飄絲絡。翻愛急雨來，不嫌濡我首。殷勤得賢主，諧謔因良友。衣上指唾痕，花前傷老醜。人間好亭館，豈必皆已有。但願興到時，深杯長在手。

四月八日飲劉雨峯新寓分韻得佳字

十年論舊雨，一日破清齋。俗傳浴佛日。去覺流光速，來貪小住佳。時出乙丑讌集詩卷見示。槐陰深小巷，花氣近斜街。早晚南船到，重看酒似淮。

題張浦畫太白像

芒角生酒星，仙才謫人世。清平三絕調，醉裏一噴嚏。可憐高將軍，不中作僕隸。脫却夜來鞵，飄然從此逝。

題張儀山中丞溫陵紀事後